



REPUBLIKA E KOSOVËS REPUBLIKA KOSOVA REPUBLIC OF KOSOVO
KËSHILLI PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

Pranimi / Dorezuar Prijemljen / Predato Licencas / Delovno	18 - 08 2022	2	viti god yoga
Organ / Shesia Organ / Jednica Org. / Unit	SKPMBSHCK	4789/2022	1/4



Republika e Kosovës
Republika Kosova - Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.601/2022

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave i përbërë nga: Ardita Haxhnikaj-Demi- kryetare, Arben Mehmeti dhe Eshref Shabani-anëtarë, me Ilire Mehmeti Shaqiri -Zyrtare e Lartë për Bashkëpunim Profesional në cilësinë e procesmbajtëses, ka shqyrtuar ankesën me numër A.nr.601/2022 të datës 06.07.2022, të parashtruar nga ankuesja me adresë banimi

kundër organit të punësimit Komunës së Klinës, në çështjen juridike "shkelje e të drejtës në pagë", duke vepruar në pajtim me nenin 6 paragrafin 1 nënparagrafin 1.1, nenin 16 paragrafi 3 dhe nenin 18 paragrafin 1 nën paragrafin 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 18.08.2022, mori këtë:

V E N D I M

I. Aprovohet si e bazuar ankesa me numër A.nr.601/2022 e datës 06.07.2022 e parashtruar nga ankuesja

II. Obligohet Kryetari i Komunës dhe Udhëheqësi i Burimeve Njerëzore të Komunës së Klinës që brenda afatit prej pesëmbëdhjetë (15) ditësh nga data e pranimit të këtij vendimi, të ndërmarrin të gjitha veprimet e nevojshme ligjore-administrative për kompensimin e pagës së ankueses sipas koeficientit të pagës të përcaktuar me Ndryshim dhe Plotësim Akt-in e Emërimit Nr.01-112-1498/22 të datës 11.01.2022 si dhe në mënyrë retroaktive të kompensoj diferencën e koeficientit të pagës nga gjashtë (6) në shtatë (7) duke filluar data e nxjerrjes së Vendimit me numër 01-Nr.117-1182/2022 të datës 11.01.2022.

III. Këshilli i Pavarur Mbikëqyrës për Shërbimin civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Ankuesja e punësuar në Komunën e Klinës, më datë 06.07.2022 ka parashtruar ankesë me numër protokoll 3936/2022 në Këshillin e Pavarur Mbikëqyrës për Shërbimin Civil të Kosovës, kundër përgjigjes së Zyrës së Personelit të Komunës së Klinës të datës 05.07.2022, për shkak të mos zbatimit të ndryshimit dhe plotësimit të Akt Emërimit me Nr. 01-112-1498/22 të datës 11.01.2022 dhe mos realizmin e pagës konform këtij akti.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Rregullores Nr.02/2018 për Procedurën e Shqyrtimit dhe Vendosijes së Ankesave, më datë 14.07.2022 ka proceduar kërkesën për përgjigje në ankesë në Komunën e Klinës. Ndërsa Këshilli, me datë 19.07.2022 ka pranuar përgjigjen në ankesë së bashku me shkresat e bashkëngjitura të lëndës.

Kolegji për Shqyrtimin dhe Vendosijen e Ankesave, me qëllim të vërtetimit të plotë dhe të drejtë të gjendjes faktike dhe bazës juridike, për marrjen e vendimit meritore ka administruar këto prova: Ankesën me numër protokollit 3936/2022 të datës 06.07.2022 të parashtruar nga ankuesja në Këshillin e Pavarur Mbikëqyrës për Shërbim Civil të Kosovës; Vendimin me numër 01.Nr.117-1182/2022 të datës 11.01.2022 të Kryetarit të Komunës së Klinës; Ndryshimin dhe Plotësimin e Aktit të Emërimit me numër 01.Nr.112-1498/2022 të datës 11.01.2022; Emalin zyrtar të datës 04.07.2022 të drejtuar Emalin zyrtar të datës 05.07.2022 të drejtuar Listën e pagave (pa datë) për nëpunësen civile Kërkesën për përgjigje në ankesë me numër të protokollit 4084/2022 të datës 14.07.2022; Përgjigjen në ankesë me numër të protokollit 4188/2022 të datës 19.07.2022; Listën e pagave për muajin Maj-2022 për ankuesen; Listën e pagave për muajin Qershor-2022, për ankuesen; Kërkesën e datës 18.01.2022 të Drejtorit për Buxhet dhe Financa në Komunën e Klinës drejtuar Ministrisë së Financave, Punës dhe Transfereve; Formularin e datës 27.09.2021 të shpenzimit të departamentit, divizionit ose sektorit; Formularin e datës 27.09.2021 të shpenzimit të departamentit, divizionit ose sektorit; Akt emërimit me numër 02.Nr.122-2912/11 të datës 01.08.2011;

Kolegji për Shqyrtimin dhe Vendosijen e Ankesave pasi ka shqyrtuar dhe analizuar shkresat e lëndës një nga një dhe të gjitha së bashku, konstatoi se ankesa e ankueses është e bazuar, **SEPSE:**

Nga administrimi i provave të lëndës përkatësisht sipas Akt Emërimit me numër 02.Nr.122-2912/11 të datës 01.08.2011, rrjedhë se ankuesja është e punësuar në Komunën e Klinës në pozitën "Zyrtare për Projekte", në Drejtorinë për Urbanizëm dhe Mbrojtje të Mjedisit, me koeficient gjashtë (6) të pagës. Të njëjtës me Vendimin me numër 01-Nr.117-1182/2022 të datës 11.01.2022 të Kryetarit të Komunës së Klinës i është aprovuar ngritja e koeficientit të pagës nga gjashtë (6) në koeficientin shtatë (7), me qëllim që nëpunësi civil të realizoj të drejtën në pagë në përputhje me punën dhe detyrat e punës si dhe praktikën në nivel vendi pasi që për pozitën e tilla parashihet koeficienti 7.0, dhe konform këtij vendimi ankueses i është lëshuar Ndryshimi dhe Plotësim Akti i Emërimit me numër 01-Nr.112-1498/22, duke përcaktuar koeficient 7.0 të pagës.

Me tej nga shkresat e lëndës Kolegji gjen së ankuesi me datë 04.07.2022 i është drejtuar me shkrim Zyrës së Personelit të Komunës së Klinës, më kërkesë për ekzekutimin e pagesës sipas koeficientit 7 të paraparë me ndryshim plotësimin e Akt Emërimit me Nr.01-112-1498/22 të datës 11.01.2022. Ndërsa kjo e fundit me datë 05.07.2022 në përgjigje të ankueses njofton të njëjtin së Zyra e Personelit ka ndërmarr të gjitha veprimet procedurale lidhur me ekzekutimin e pagesës mirëpo ministria përkatës nuk ka ndërmarr asnjë veprim.

Ankuesja e pa kënaqur me përgjigjen e datës 05.07.2022 të Zyrës së Personelit në Komunën e Klinës, ushtron ankesë në Këshillin e Pavarur Mbikëqyrës për Shërbim Civil të Kosovës për shkak të mos zbatimit të ndryshimit dhe plotësimit të Akt Emërimit me Nr. 01-112-1498/22 të datës 11.01.2022 dhe mos realizimin e pagës konform këtij akti.

Në përgjigjen në ankesë, Organi i punësimit deklaroi së Komuna e Klinës përmes Zyrës së Personelit disa herë radhazi ka bërë përpjekje tek Thesari i Kosovës lidhur me realizimin dhe harmonizimin e

koeficienteve konform Akt emërimeve, pasi që Komuna posedon dhe ka ndarë mjete buxhetore mirëpo nuk ka marrë asnjë përgjigje nga Thesari i Kosovës.

Lidhur me shqyrtimin e themelësisë së pretendimeve ankimore Kolegji i Këshillit ju referua dispozitave të Ligjit Nr.06/L-114 për Zyrtarët Publikë, përkatësisht nenit 19 ku theksohet se: *Zyrtari publik ka të drejtë në pagë dhe shpërblim për punën e kryer si dhe shtesa të përcaktuara me Ligjin e Pagave*, ndërlidhur me këtë neni 3 i Ligjit Nr.03/L-147 për Pagat e Nëpunësve Civil ka përcaktuar se: *1. E drejta e nëpunësve civil për pagë të drejtë dhe të rregullt është e garantuar në bazë të kushteve të përcaktuara me këtë ligj dhe me Ligjin e Shërbimit Civil. 2. Institucionet e administratës publike të Republikës së Kosovës janë të detyruara të paguajnë pagë të njëjtë për punën me vlerë të njëjtë....*, dhe rrjedhimisht në kuptim të këtyre dispozitave ligjore rezultoi se e drejta në pagë është e drejtë themelore nga marrëdhënia e punës dhe nëpunësit civilë të cilët kryejnë detyra të ngjashme të punës ju garantohet dhe duhet të realizojnë pagë të njëjtë për punë të njëjtë.

Kolegji i Këshillit për vendosje meritore të kësaj çështje juridike ka analizuar edhe nenin 7 të Ligjit Nr. 03/L-147 për Pagat e Nëpunësve Civilë me të cilin është përcaktuar se: *1. Udhëheqësit e institucioneve të administratës publike ia propozojnë gradat e pozitive në institucionin e tyre ministrisë përgjegjëse për administratë publike, në bazë të rekomandimeve të personit përgjegjës për burime njerëzore në institucionin e tyre, i cili është përgjegjës për zbatimin e standardeve dhe procedurave për klasifikimin e vendeve të punës në Shërbimin Civil. 2. Grada për secilin pozicion të punës dhe ndryshimet, miratohen nga Qeveria, me propozim të institucionit përkatës dhe aprovimit paraprak të ministrisë përgjegjëse për administratën publike dhe ministrisë përgjegjëse për financat....* andaj, në kuptim të dispozitave ligjore si më lartë dhe duke u bazuar në shkresat e lëndës Kolegji gjen se organi i punësimit në këtë rast Komuna e Klinës ka ndër marr të veprimet nevojshme për harmonizimin e koeficientit të ankueses gjegjësisht janë nxjerr aktet administrative me të cilat ankueses i është njohur e drejta e nivelizimit të pagës, janë planifikuar mjete buxhetore si dhe është bërë kërkesë në ministrinë përgjegjëse për ekzekutimin e aktit për nivelizimin e koeficientit të pagës, mirëpo që kjo e fundit nuk ka ekzekutuar kërkesën në fjalë, andaj mbi bazën e kësaj gjendje faktike, Kolegji me të drejtë vlerëson se ankuesja në kuptim të realizimit të së drejtës së pagës vazhdon të trajtohet në mënyrë me pak të favorshme se sa nëpunësit civilë të cilët ushtrojnë pozitë të njëjtë të punës në institucionet tjera publike, rrjedhimisht nisur nga ekzistimi i këtyre fakteve rezultoi se aplikimi i koeficienteve jo të njëjtë të pagës për pozita të njëjta të punës, paraqet trajtim jo të barabartë dhe diskriminues të stafit dhe një veprim/mosveprim i tillë i organit të punësimit është në kundërshtim me nenin 3 të Ligjit Nr.03/L-147 për Pagat e Nëpunësve Civil si dhe me dispozitat e Ligjit Nr.05/L-021 për Mbrojtje nga Diskriminimi përkatësisht nenin 4 paragrafi 1 ku përcaktohet se *"Diskriminimi i drejtpërdrejtë konsiderohet kur një person trajtohet në mënyrë më pak të favorshme sesa trajtohet, ka qenë i trajtuar ose do të trajtohet një person tjetër në një situatë të krahasueshme, sipas një apo më shumë nga bazat e përcaktuara në nenin një (1) të këtij Ligji.*

Për me tepër bazuar në gjendjen faktike si më lartë, Kolegji vlerëson se mos kompensimi i pagës së ankueses sipas aktit për nivelizimin e koeficientit të pagës bie ndesh edhe me parimet e përgjithshme të menaxhimit të zyrtarëve publikë konkretisht nenin 7 paragrafi 1 të Ligjit Nr.06/L-114 për Zyrtarët Publikë, me të cilin është theksuar se: *Menaxhimi i marrëdhënies juridike me nëpunësit civilë, me nëpunësit e Shërbimit Publik dhe me nëpunësit administrativo-teknikë dhe mbështetës, udhëhiqet nga ligji dhe bazohet, gjithashtu, në parimin e mundësive të barabarta, meritës, transparencës, profesionalizmit dhe paanësisë politike, mosdiskriminimit, përfaqësimit të drejtë gjinor dhe të komuniteteve dhe synon garantimin e qëndrueshmërisë dhe vazhdimësisë në detyrë*, e mbi këto arsye, Kolegji konstaton se pretendimet ankimore të ankueses janë të bazuara dhe të ligjshme.

Andaj, theksuar si me sipër, obligohet Kryetari i Komunës dhe Udhëheqësi i Burimeve Njerëzore të Komunës së Klinës që brenda afatit prej pesëmbëdhjetë (15) ditësh nga data e pranimit të këtij vendimi, të ndërmarrin të gjitha veprimet e nevojshme ligjore-administrative për kompensimin e pagës së ankueses sipas koeficientit të pagës të përcaktuar me Ndryshim dhe Plotësim Akt-in e Emërimit Nr.01-112-1498/22 të datës 11.01.2022 si dhe në mënyrë retroaktive të kompensoj diferencën e koeficientit të pagës nga gjashtë (6) në shtatë (7) duke filluar data e nxjerrjes së Vendimit me numër 01-Nr.117-1182/2022 të datës 11.01.2022.

Kolegji pasi ka shqyrtuar shkresat e lëndës, e duke u bazuar në nenin 18 paragrafin 1 nën paragrafin 1.2 të Ligjit Nr.06/L-048 për Këshillin e Pavarur Mbiqësor për Shërbimin Civil të Kosovës, vendosi si në dispozitiv të këtij vendimi.

Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike:

Kundër vendimit të Këshillit, pala e pakënaqur e mund të iniciojë konflikt administrativ në gjykatën kompetente, Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.

KËSHILLI I PAVARUR MBIQËSOR PËR SHËRBIMIN CIVIL TË KOSOVËS
Lënda me numër A.nr.601/2022

Ilire Mehmeti-Shaqiri

Procesmbajtëse

Ardita Haxhnikaj-DEMI

Kryetare e Kolegjit

Vendimi i dorëzohet:

- Ankueses
- Kryetarit të Komunës së Klinës;
- Udhëheqësit të Burimeve Njerëzore në Komunën e Klinës; dhe
- Arkivit të KPMSHCK-së.

